

南宮縣志

甯宮縣志卷十六目錄

物篇

德行列傳

共一百四十五人

土翰 李萬奴 白友諒 齊仁美 關貞

韓繼芳 齊舜臣 安惟志 孔道立 孔道源

張庚 白若鷺 白玥 宋似韓 李從龍

白文傑 賈還素 閻斌 高文友 張文炳

魏世興 郝萬全 王晨 張愿 陳作楫

李福成 孫仲聖 劉同 韓士琰 張鳳翥

孫春泰 張守本 張修茂 石廷勛 李松青

張文炳 趙梅 穆國賢 焦文成 彭致誠

趙魯典 馬九圍 以上孝友

張廷玉 崔欽 李楨 韓珂 王技

鮑國 孟從儒 錢勵 鮑宏謨 乞文華

李還醇 張太和 關萬化 楊日昇 趙曄

王夏 宋家允 范銓 齊振英 馮良翰

齊維翰 尹志 李鐸 王紹宗 周紹謨

張鵬翔 魏國琬 劉中選 張聚美 王兆瑛

潘珍 王修讓 鮑致中 王會先 鄒檀

陳蘭亭 陳文炳 王兆槐 謝安泰 齊世松

齊夢龍 蓋盡才 李坤 王嘉善 李瑤

毛顏 毛德潤 馬振業 董景和 郝開周

陳泰然 陳書聲 張鴻達 李維達 劉士魁

閻增修 李鳳年 高鳳山 李宗惠 張從上

郝成修 陳繼祖 張普英 齊文煜 華文綱

李鵬霄 李永敬 魏履初 馮清汪 李壽朋

孫長泰 韓澤恩 張芳圃 趙申年 馬本魁

安振邦 張瀛洲 杜庭輝 李榮恩 以上任郎

孔環 崔燦 張進寶 劉有瀾 閻汝茂

賈還樸 尹倫 李之琳 李光國 白若鵬

韓允祺 連報 李顯祖 李永慶 李廷梅

岳冬泰 陳泰來 王來誠 王鶴鳴 王元振

鄭西甫 于光昕 韓真英 王彥文 以上忠義

南宮縣志卷十六

鹽山賈恩紱編輯

文獻志

人物篇中

記有之太上立德其次立功其次立言此千古論定
人物之標準也舊志於人物率分門類而先後輕重
不厭人意且或失之緜碎光緒志不分類別以年代
爲次似無可議矣顧方志之人物以觀感後起爲重
不爲類別無以興後人思齊之念亦未爲得也茲標
三不朽爲綱一曰德行二曰名績三曰文苑一綱之
中更有異趨者則亦各以類從俾讀是編者得知其

注重之要則有以興其廉頑立懦之思有心者其亦有樂於此乎

德行列傳

孝友
忠義

任卹

德行之所該較廣有不能併爲一談者茲卽本傳所詳者約略分爲三目一曰孝友人生立品莫大乎是故首列之其品格與孝友相近者則爲長者有道之徒以其無多人也不更標目附於孝友之列非雜廁也次日任卹一方人物無多六行之中惟任卹尙爲習見故次之三日忠義與兩目皆不爲類然亦德行中之一也故又次之又前志皆首列南宮适适雖德行中人而漢取縣名之意已失

其傳不得以風馬牛不及之魯人強爲坵會說詳沿革下茲篇不載南宮子從其實也

五代王翰五代時人母失明醫云必得人目睛補之翰自抉

右睛附母目目爲復明宋涪化中詔賜粟帛

參巖輔志

明李萬奴天性純孝洪武初母疾劇計無所出禱於神割左腋取肝少許以療母母病尋愈萬奴亦無恙人以爲至孝所感詔旌其門

白友諒恭敏公父靖難兵起隨父母避兵林莽間時臘月父以友諒生日命友諒侍母歸家祀先中途遇兵友諒泣告曰吾生死惟命幸勿害吾母兵義之釋其母以友諒從行數里友諒念母泣不止亦釋之因母子相失友諒尋母至兩月始

得於草野間不火食者已踰旬矣竟得俱生與父相見後友
諒弟友直當從軍轉餉友諒以弟無子願代弟行母不許友
諒壻吳彬慨然以身代之比返友諒分家貲之半以酬其勞
後以子圭貴封如其官

齊仁美性孝友好施宣德中出粟一千五百石助賑詔賜冠
帶每遇清明輒鬻棺以掩骼埋胔有弟幼悉割己田與之遠

近服其義雍正二年崇祀忠義孝悌祠

胡志參
畿輔志

關貞關震子方娠而父卒母張撫貞及長以孝聞正德中流
賊入城獲其母子欲殺之母謂賊曰我夫歿三月而生此子
願殺我勿殺子貞泣曰母撫貞孤苦願殺貞勿殺母賊義而

俱釋之

胡志參
畿輔志

韓繼芳嘉靖間以廬墓爲知縣葉恆嵩旌隆慶間知縣胡嘉謨又旌其門萬厯初巡按御史移檄獎之

畿輔志

齊舜臣年甫童齡以孝聞遇時物必先獻親而後食父異之因以舜臣爲名母孔氏疾徧禱神祠願以身代及卒不食者累日哀毀骨立父昇病痢五年汗穢狼藉舜臣躬自澣濯侍湯藥扶持卧起厯久不懈時舜臣未有子父將絕仰而歎曰天乎以我子舜臣之孝肯令乏嗣乎父卒後舜臣夢神賜李二尋生二子眾以爲孝感所致事繼母李尤篤撫一弟二妹無異同胞隆慶六年本縣聞於巡按御史旌其門

胡志參
畿輔志

安惟志少喪父事母胡至孝母疾詣廟禱曰生早喪父恃母爲命今母病亟願以身代母思肉急不能得遂割股肉躬烹

進母母啖而甘之病尋愈年八十四卒隆慶六年本縣聞於

巡按御史給粟帛旌其門

胡志

孔道立郡庠生隆慶中父歿躬負土築墳寢卧其側者三年朝夕取水爲供苦汲道遠墓旁有古井掘之甘泉湧出人以

爲孝感諸生具聞有司旌其門

胡志參
織輔志

孔道源廬母墓三年足跡不窺戶庭惟一犬隨廬中乏薪水則爲書繫犬頸帶之馳歸家人卽時應給時人感歎異之

胡志

參織
輔志

張庚字文西母劉氏夢星大如斗隕於懷驚覺而生庚父早卒劉氏撫之年十七補弟子員博涉書史以聖賢自負性至孝晨夕必定省朔望必拜母他往則拜母之衾枕暑恆衣冠

正襟危坐讀書若起聖賢於千古而面相訂質者忘寢廢食如是二十載著四書庸言詩經庸言多前賢所未發舉德行復舉孝子縣令邢侗手書額其門聘爲弟子師欲以妹爲庚繼室庚力辭令益敬之嘗語人曰南宮張秀才讀書三十年寢處不愧其形影郭有道之流亞也又館於撫院張鹵歎爲真正理學奇才天產遇之甚厚指揮某犯法囑要人詣鹵緩頰鹵言必庚居間乃可指揮聞之詣庚懇求願持千金爲壽庚持不可力卻之萬曆七年舉人十四年進士試性命策主司稱庚與袁黃作爲僅見極參理奧膾炙人口推爲一代真儒選澗池知縣未就再補褒城縣知縣執法不阿愛民如子以母老乞養歸廬舍蕭然如未仕時其讀書處自爲楹聯曰

道脈衍爲家國心田留與子孫耕

胡志參
畿輔志

白若鸞字洛溟坪曾孫父早世母李撫之定省之餘發憤力學萬厯三十七年登鄉薦母喜曰是可以慰爾父於地下矣鸞感然曰兒未能逮事大人罔極未報奚足云無忝耶會母卒無意仕進以貧故署邯鄲教諭未幾卒鸞孝友奉母備極承順慟父早世祭享必虔潔撫兄遺孤衣食咸出己子右鸞卒貧不能葬邑人侍御賈公爲之經紀其喪復置田以贍其子孫

白珩事親孝夕則手展衾枕晨則卷之茶必親爇白一日不見父母則慟然不樂厯三十餘年如一日

宋似韓字侶弼邑增廣生聰慧好學志潔行芳田僅百畝下

能自給少失怙罄私蓄以營喪菽水奉母承顏順志怡如也
讀書遇不平事輒扼腕慷慨外冲虛而內篤摯卒以數奇不
售資志以歿天放散人丁繹爲作貧士傳一時名士題跋甚
眾

李從龍號廣純文熙仲子事繼母以孝聞隨父宦遊四十餘
年依依膝下定省弗愆敬兄友弟內外無間言舉德行著有

竹舍存草寒蟬集崇禎戊寅城陷死節

道光志參
畿輔志

白文傑字英吾號東野少從叔祖靜齋學家貧兼貿易以贍
二親子五人俱以文學知名擬之燕山五桂文傑每誡之曰
凡讀書期明義理敦品行不以科目重也順治八年長子瑤
舉於鄉製衣以進不受曰厚飾必多取多取必敗守孝廉之

南宮鼎元 卷一
名豈易副哉吾閩治國莫若愛民養身莫若寡欲二語言簡
意盡汝曹宜識之尤好讀太上感應篇常曰對此善念自生
先是嘗爲鄉飲賓及瑤貴絕不復赴曰吾愧世之以子而賢
其親者年躋大耋退然抑損不以齒先人含淳抱璞有古隱
君子風焉

賈還素字無染歲貢生侍御多男仲子天性孝友崇禎戊寅
之變長兄還樸効死埤堦間還素求尸原野哀感行路時侍
御公丁內艱感末疾還素內視寢膳外驚烽火日夜憂勞一
病幾殆癸未侍御公捐館力疾襄事戊子母病衣不解帶者
累月姪介伯早卒遺孤孝續甫四十日恩勤教養後遊庠分
半產與之一毫不私壬子選廣文不就年七十九卒

闕斌武庠生膂力過人熟讀七子兵法性至孝當明季兵燹之際母子分散無踪斌方弱冠日夜啼泣稽顙北辰冀有母子相見之日足跡所至無間山川後裹糧赴都門遍行訪覓幸與母遇悲喜交集抱頭痛哭亟歸而謀諸婦典衣裳釵釧贖母還家菽水承歡融融洩洩待母躋上壽極含飴弄孫之

樂

胡志

清高文友字魁儒七歲喪父事母鄭尤謹母疾醫禱弗效割臂肉煮粥進疾尋愈居恆曲體親意嘗有鬻女者市以侍母母卻之跪而請母告以不忍立召其父母還之不責償及母以壽終躬負土成墳構廬墓側終制不歸邑令再三諭乃歸其廬墓時天寒風雪中有人餉以漿挾一簋甚重遺之去

南宮縣志 卷一
跡之不見人詫爲神貺云雍正十一年旌表

道光志參
姚鈺撰傳

張文炳父疾甚劇思鮮魚時值隆冬文炳急出覓之未數里有烏銜一魚墜地持之手中猶掉尾烹以進父病愈有井距所居里許水甚甘父母嗜之文炳日往汲懼井壞修之既成烟出三日井發遂變爲琉璃至今猶存眾名其村爲孝子張家莊縣令旌其門

魏世興字子隆康熙五十六年舉人天性誠篤仰承親志教誨子弟弟世隆子國珖相繼成進士猶子輩食廩餼入邑庠者指不勝屈會部截取以親老辭不赴己酉弟世隆選固始知縣父命偕往弟患瘧疾延醫調治俟服藥畢乃就寢逾年世隆亦以親老就教遂歸父子兄弟聚首一堂極天倫之樂

父母皆壽踰八十而終世與嚴氣正性秉道嫉邪每講學至惡鄉愿章必曰如某某者卽鄉愿也汝等宜痛絕之病亟猶諷誦見善如不及章謂致遠經方難到而履潔懷清易幾以勉其子年七十有四卒

郝萬全字玉德性孝友事繼母得其歡心撫愛異母弟尤篤遇凍餓者解衣推食無少吝常拾金若干務覓其人還之子珍有隽才勉令勤學及屬纊無它言諄囑讀書而已珍中康熙中舉人授滿城教諭孫琴亦中鄉魁祁州學正皆品端學優教授生徒多所成就

王晨字升若先世有隱德至晨益擴而大之乾隆元年舉人公車三上以少失恃父年高罷計偕經截取知縣得選不赴

性寬厚與人無忤人有忤之者亦不校家計素封而處以淡泊惟嗜讀書接引後進每良朋在座子孫侍側咏前聖之格言揚昔賢之盛藻愉愉如也邑令顧朝泰請充鄉飲大賓三十一年荷特恩欽賜翰林院典簿子汝翼戊子舉人孝友篤厚克迪前光孫書勳別有傳曾孫汧皆登賢書書香爲一邑冠

張愿字抱樸乾隆乙酉拔貢生博學能文性寬厚與物無忤而制行高潔人不敢干以私選河工州判以父母年高不就教授生徒終其身

陳作楫字濟川號鴻雪別號蓮舫聰敏好學家貧羔雁盈門多所成就嘉慶十三年進士授保定府學教授廉靜誠樸門

絕私調爲通省學官楷模

李福成字來祿號瑯圃道光二年舉人好學能文品格純粹少失怙與兄庠生玉成友愛甚篤有姊撫孤守節貧無所倚福成迎養教甥華九齡早遊庠序

孫仲聖爲母許淡食終身母病愈與父僑居商家林父患目疾漸至失明仲聖前在通州關帝廟傭工知有妙藥奔往取之且禱於神每飯前咽糠三碗後其子不忍爲代咽一碗父目復明廟內馬道士常往來欽天監偶爲稱述無不嗟嘆知爲村農因賜天文生頂帶榮身後合鄉共舉縣令給匾旌表劉同親亡廬墓有白雞犬各一自來廬側苦汲道遠掘地三尺有甘泉足供孝子飲服滿邑令唐明勸歸釋服旌其門曰

孝行克敦雞犬不知何往泉亦漸涸

韓士倓太學生年八十四歲有子三人孫七人曾孫八人元孫三人五世同堂子桂孫仲清仲溪仲漢曾孫丕基亮基俱庠生同居共炊一庭雍穆道光二年邑令詳其事奉旨飭大吏旌其門曰五葉衍祥

張鳳翥有令德學有淵源道光十二年舉於鄉咸豐癸丑大挑一等分發湖北試用知縣因病不果行居鄉授生徒及門科舉聯鑣當時稱盛同治二年土匪肆擾倡捐修寨一牌五村均獲安堵

孫春泰字和圃號蓮溪性純厚而資穎異讀書如夙習年十八補諸生學益篤經史百家手錄成帙十上京兆不第以恩

貢就教職候銓家居課子姪以修身立行爲本生平嗜呂新
吾申孚孟兩先生書及各先正格言錄以爲教遇事輕財尤
篤師友遇貧乏助柴米不告人人稱長者本邑要務如增膏
獎修奎樓廣學額皆力勦成之不居名同治壬戌之亂縣城
戒嚴春泰時方廬墓聞警以老母在城歸謀守禦是年十二
月三十日賊薄東城下春泰於城上燃炮斃賊賊驚遁卒年
五十有七

家傳參
採訪冊

張守本字立堂家貧失讀生有摯性父明綱母陳氏守本力
農服賈孝養不倦父母相繼歿哀毀欲絕既葬露宿墓所村
人爲築草舍廬居三年乃歸族有義學將廢出貲修葺鄉人
感其義請儒學額其門

南宮縣志 卷一
張修茂字竹亭咸豐八年舉人以知縣歸部候選幼失怙恃
奮志讀書冬不鑪夏不扇遊庠後益自刻勵學問淵博家貧
課徒爲業及門多所成就既卒門人路學孟誌其墓

石廷勛優增生少孤有至性曾祖母祖母與母俱寡廷勛問
安視膳無間時母病滴水不能入口廷勛二十餘日不解衣
禱南海祈以身代忽一日母呼水家人問之曰有一老嫗導
之歸曰爾且歸數十年後方可來壽九十餘鄉里至今稱孝
子焉

李松青十七歲承嗣伯父獻文獻文有地二十餘畝而本支
奇貧松青以嗣產奉葬本生父母親亡愛弟逾篤勤儉治家
置地百畝仍均分於弟

張文炳少失怙事母孝定省必勤母好善文炳將孝經感應諸書朝夕敬誦母前母疾甚百方調藥母沒取遺衣親手澣濯每設以祭

趙梅九世同居父子伯叔兄弟凡四十餘口怡怡如也或以微故意存析居者梅涕泣不食祈親族調停至釋乃已前令爲之詳請建坊

穆國賢子思禮孫廷吉曾孫文清文芳元孫世增五世同堂自思禮至元孫金聲又五世同堂洵人瑞也

焦文成太學生年七十九歲子二人孫九人曾孫五人元孫一人五世同堂子以和庠生孫德昌廩貢生服昌西昌庠生曾孫其相其楨庠生其桂廩貢生其楹增生元孫某又高學

福於光緒十一年闔村送五世同堂匾

彭致誠少時父遠遊不返向母問父母告以故聞之泣後聞父在瀋陽寄書求父歸久無耗乃謀諸兄往尋父兄以貧故阻之不聽艱步達瀋始知父死遂於叢塚中號泣淚盡繼之以血土人哀之代詢其父執友得葬處開壙面如生致誠裹以衣被負而歸屍輕如槁若有神助逆旅或不納獨棲曠野伏屍旁假寐凡數十晝夜達里門竟得葬於祖塋之次

訪冊參王

一鴨弔撰傳

趙魯典字宗周和生店人邑庠生設教鄉里徇徇善誘事親至孝親歿因慟哭失明民國五年其門弟子爲立碑以表揚之

馬九圍字式化西馬固莊人寬厚樂易年踰強仕事母跪拜如小兒以博親歡鄉里稱爲孝子民國九年總統褒給孝思錫類匾額旣歿邑紳邢之襄等爲建碑于墓

以上孝友

明張廷玉

畿輔志作廷友

蓋通正統五年歲飢各出粟壹千五百石

助賑詔旌其門

胡志

崔欽字宗正別號靜庵居士性好義修廟宇鑄神像造橋穿井興福寺接引橋碑陰載其一十八工正德五年重修崔府君祠邑人孔賢爲之記

李楨字三樂號吉庵天性質樸絕不知人間有機巧事爲農勤儉長子文振次子文熙後文熙顯達楨益退遜佃人執竊

禾者請鳴之官楨曰以歲之不易吾不能賙貧奈何校此區區爲釋之族子與人鬪叱之曰縉紳不陵人誰敢陵縉紳者吾不能撓三尺庇若也合族聞之僉慄慄奉法文熙令汶上文振佐洪洞不肯就養諄諄勉爲清白吏歲時致布粟爲養廉助且命曰此爾父母胼胝經營中來儘可供爾輩衣食慎勿漁獵百姓玷清白貽父母羞文熙官侍御別有傳

韓珂字廷器慷慨好施嘉靖癸丑庚申歲大饑珂設粥活流民千餘人歸皆有所贈收養遺棄嬰孩哺乳之欲取爲子女者聽有木容負九十金不能償飾其女孫將以償債珂蹴然起曰安有是立折券還之值大霖雨珂度塾師周某大窘遺之米及薪周果斷火終日矣流涕曰生我者父母知我者

韓公也里人皆曰韓太公多陰陽其子孫必有興者後珂孫

策爲參政以考最贈祖父如其官

道光志參
畿輔志

王技號北泉先世有令德至技而行益修里有爭論輒就決
曲直徐出數語皆聽服無言居常力田自給而時出其餘周
鄰里訓子孫讀書飭行誼慎交遊子納忠爲錦衣衛千戶孫
標極崇禎十年舉人聯捷成進士處之夷然嘗戒家人曰勿
以貴加人其器識宏遠類如此後壽八十四

鮑國邑諸生性端謹囊頗盈餘親友借貸任其還欠喜怒不

形至孫曾人益茂皆謂高義之報

胡志

孟從儒崇禎二年五月初三日自鄉歸城拾遺珠貼示候取
數日其人至悉還之遺珠者出數顆以謝不受後其子遵時

應崇禎九年鄉試試官閱其卷見珠光閃爍奇之薦中第六名批其首藝曰字字跳脫句句圓潤恰是一幅真珠簾騰其光燄也人以爲還珠之報

舊志參
畿輔志

錢勵字獻廷崇禎六年武舉戊寅城被兵焚燬幾盡邑令周而淳創建甌城勸民助資勵以數十睥睨自任費不下千金爲一邑倡庚辰歲飢出粟百餘石煮糜賑荒貸人以錢米不

責償義聲震一時

道光志參
畿輔志

鮑宏謨字清白邑庠生富而好義父卒檢遺券二千餘金皆焚之湖廣商黃姓以數千金市布寓宏謨家去十餘年無音耗詢知被流寇難召其子還之邑宦避土寇亂倉猝寄其橐可數千金事定付之封識宛然

乞文華字燦字崇禎戊寅之變扶兄攜姪踉蹌金戈鐵馬中
得免於難辛巳大飢文華以善居積一家溫飽又推其餘以
濟人之急待以舉火者甚眾甲申鼎革捐貲捍城爲富室倡
一時好義急公指首屈焉

李還醇字本來邑諸生性慷慨爲鄉里排難解紛父老稱平
崇禎間畿內苦兵男女流離還醇施粥散錢婦人遇難者則
養於嫠婦家訪其家人俾歸完聚歲凶深自節損以餘貲賑
餓者所活甚眾初艱於舉子晚歲生子培基順治三年進士
授中書

張太和號小川父得利以行義高里中生子三長卽太和次
慎言次慎行太和性孝友善居積家以裕見弟慎行有雋才

爲延師教讀舉進士歷官州牧以兄持家養親無內顧憂故所至著績太和自奉儉約義所當爲揮金無吝色念里中所苦無如地方一役乃買田二十畝歲收其入以待徵發里人賴焉年七十三卒

關萬化邑庠生與族人際昌爲兄弟際昌父陶成貸萬化父朝藩三十金其父俱歿際昌檢笥中得其父貸金券破產湊金如數償萬化萬化以先人未有遺券不受際昌固請相與推讓久之族長勸令平分際昌終歉然於不盡償萬化亦終以辭之不力爲愧邑人賈蘊沖爲作傳論曰人爲德於親不忍忘也親爲德於人不忍不忘也豈非以忠厚長者自處而卽以忠厚長者之道事其親者與

楊日昇字晉明年十八舉茂才勵志學問一時有武庫之目
天性孝友事父母曲意承歡濟人緩急絕不作吝惜之態飢
爲哺寒爲衣咸謂爲長者子含素中康熙二十一年進士

趙曄鄉民也秉心慈惠施衣食助婚喪者三十年崇禎戊寅
城陷曄出粟四十石募人遍埋無主尸骸崇禎十二三年凶
荒相繼邑令周而淳勸賑曄捐米一百石兩院旌其門甲申
流寇破城彭公遇害曄出金五十兩買棺收葬立碑表墓當
僞官肆虐人皆畏懼曄獨仗義冒危捧彭公之首合葬真義

士也

畿輔志

王夏傭工營生粗豪尙俠儕輩憚服之及彭公殉難無敢收
埋者夏涕泣曰我輩受侯深恩今侯罵賊而死奈何令暴露

道路遂與趙擘李調順等掩於城外東南隅事平侯姪彭可謙任大名別駕以數十金柑酬夏固辭不受人咸高其義

畿輔志

宋家允邑庠生彭公殉難時遺兩夫人二幼子闔勢正熾無敢收養者家允憤不顧身特延至家供養數月事平送還原藉後兩公子成立詣南宮禮謝之遂爲世交

畿輔志

清范銓字小安有田八百餘畝順治初甫離兵荒瘡痍未復銓每年冬計一歲所入除用度外悉蠲餘粟在城煮賑又市綿衣數百件分給鵠結者三十年不怠大吏前後匾旌其門鄭誼武庠生嘗買一婢聞已字人卽覓其夫還之又有孀婦家貧鬻次子與誼爲僕後長子死孀婦來告誼憐其無子卽

取券焚之令隨母去

齊振英字肖吾例貢生家素封邑頻遭荒旱煮粥以食餓者邑令佟國琳勸賑捐粟數百斛冬施衣喪施棺以濟貧又刊刻經典善書廣之同好

馮良翰字伯申邑諸生性寬厚與物無爭威縣有軍地例納子粒於京倉民甚苦累妄人誑以數百金地可歸民籍鄉人以爲信貸良翰金畀之已而悉其誑訟之官官審實追金良翰曰此金責之妄人則死不能償責之鄉人吾不忍其無知而虛費也釋而不究事遂寢良翰都中有布估歲終命僕夫輿金歸至武邑逆旅夜失金一封無出入跡同宿者二人良翰曰三人同鞫必有無辜被刑者願勿追武邑柳令歎息而

罷

齊維翰字申甫歲貢生性好善常欲利人濟物與弟維甯同出金於城東北隅建立育嬰堂遺棄嬰孩多所全活

尹志字莘臣邑庠生好讀書嫻韜略中順治十八年武進士任徐州府左營守備及解綬歸新河教匪滋事乃捐貲募鄉勇守城賊知有備不至新河婦女百餘口集城隍廟內議者慮有變欲遣之志謀諸邑令胡公使人防守捐粟食之兩閱月事平皆得完節去其所費典田償焉邑令匾獎今尙存

李鐸字木宣康熙十五年武進士矜氣節重然諾慷慨有大志遇不平事輒義形於色不顧利害卒以此爲勢要所傾陷

鐸處之泰然

道光志參
畿輔志

王紹宗字雲貽邑庠生方伯標極孫賦性孝友動遵禮法自處淡泊而好施康熙癸亥甲子連歲不登流離載道紹宗施粥拯餓捐米數百石垂楊慈塔兩村地十餘頃佃者虧租數百金胥蠲之其餘折券棄負伙婚助嫁指不勝屈子九人長廷琦另有傳

周紹謨字希文舉優生周貧恤困常若不及康熙壬寅雍正癸卯連歲大歉紹謨捐穀六百餘石助賑創建義學七處置宅施地籌畫周詳族人某五十無子爲買妾生子三人邑令郭潔谷確先後旌其門雍正十年邑令邱性善復以其義行詳請具題蒙恩貢入成均乾隆元年選定興教諭卒於官

張鵬翔字圖南邑庠生進士子發之父績學不售以成就人

才爲務負笈者踵相接不屑屑計修脯貧者解衣推食或捐書贈之經指授者多掇巍科去次亦有聲黌序間旣卒門人思其教澤附石隧道以頌焉

魏國琬字月川孝廉世興子乾隆元年進士侍養庭幃不樂仕進生平濟人利物汲汲不倦及卒鄉人爲立感德碑弟國琛貢生著公門修行勸誡編三卷採輯周詳立言諄切孫炳文貢生嘉慶二十三年重修東陽書院捐地四十畝爲歲修資縣令吳承寵旌其門曰德種書田

劉中選字青萬家素封慷慨好施乾隆丁卯己巳歲歉鄉人多不給中選以公然施惠受者無地乃逢人借粟人率四斗年豐來償皆不受閩鄉感德誌其事於石

張聚美字厚泉樂善好施每遇大徭役爲本牌六村無力者代輸孫得名克紹其志遇鄉人爭訟每反覆譬解不使匍匐公庭前後縣令旌其門同牌感德立二碑紀其事

王兆瑛字渭紫以國子生遵例任通政司經歷時滿經歷永某貽誤獲譴堂官將劾之兆瑛力請曰誤固由某而職與同官願並職名上時稱爲長者先世素封好施與兆瑛承先志值邑令衷炳修募修東陽書院先輸以爲邑倡又自備器具完整足用誦讀者便焉

潘珍字燦華邑庠生先世好行其德本牌八村徭役公費輒代捐輸珍繼行之乾隆二十二年清河大水難民多徙南宮珍收養四五百人州牧吳勘災館其家旌以匾闔牌爲立感

南宮縣志 卷十六
德碑

王修讓字遜思援例授通政司經歷勤慎供職上官倚重之考滿方擬薦擢以宦情淡告歸里恤宗族睦鄉鄰緩急叩門未嘗有難色每乘車入邑門必下里門必下遇相識必下人重其德以爲有萬石君風

鮑致中字道凝乾隆四十年與弟致福等建義學於本村置腴田四十五畝以充館穀縣令朱爲之記

王會先性慷慨不惜金貲乾隆四十七年施地二十畝以備村里差徭及地方經費前令批准存案閣鄉立碑誌德焉

鄒檀字梁棟儉於自奉而施與慷慨族屬鄉黨凡憚獨及貧不能婚葬者必竭力賙濟之乾隆辛亥王子間歲大稔出粟

助賑全活無算又爲粥於里中以食饑者長子雲烜克繼父志嘉慶十八年大旱煮賑活里人制府溫公疏奏與旌

陳蘭亭字馨九附貢生遇鄉里歲歉輒捐粟煮賑里人賴焉親朋內有貧不能婚葬者量加賙卹尤好勸釋爭訟排難解紛不辭勞瘁不避嫌疑與高邑縣李經芳有舊乾隆王子經芳由太守補雲南提舉貧不能赴任蘭亭爲轉貸千金後聞其道卒代還其值由此益重於士林

陳文炳字煥如廩貢生好學能文弱冠遊庠旋以優等食廩餼篤事二親友愛兄弟其先世有隱德文炳以忠厚繼之嘗曰人之一家猶人之一身全恃元氣元氣日積則日厚厚則強愈削則愈滅滅則弱忠厚者一家之元氣也家之盛衰視

之聞者以爲名言爲人冲和見義勇爲嘉慶辛酉水癸酉旱
兩次煮粥晝夜在厰襄其事雖癘疫薰蒸不使人代癸酉旱
時見有窮迫捨幼女爲尼者力勸止收養年餘適山右人請
撫爲女乃遣之子柱戊辰進士仕山右訓之日爲官首重在
勤不遲延不拖累則民受賜多矣遇覃恩累封奉政大夫年

八十二卒

道光志參顧
菴撰墓誌

王兆槐字位三附貢生嘉慶六年大雨連旬漳河泛溢大窑
村東爲往來孔道車馬多阻兆槐邀邑人周章會等募修普
濟橋一座日夜經營不辭勞瘁自捐錢五百餘千凡布施俱
載碑陰已所捐獨不載

謝安泰字清一援例授州同性儉能施乙丑本邑修學宮捐

銀助修經理公費出入釐然親族有匱乏必調卹之其子孫從孫輩克紹先志數捐義倉義穀巡道兩次賜匾曰誼敦桑梓曰豐登義樂凡邑中義舉每捐資首倡

齊世松字封五例貢生慷慨有智略家素封世松益擴大之好義勇爲熟悉工程邑中諸大工皆屬其經理費省而工固冀州修文廟捐千金嘉慶六年大水捐米五百石煮賑十八年大旱捐銀一萬五千兩總督溫承惠奏蒙恩賞子如驥舉人一體會試是年林匪構逆助軍餉銀二萬兩復蒙恩加從三品銜其他濟急賙貧所提攜者甚眾年七十七卒長子如煜拔貢生援例捐戶部郎中次子如穎三子如驥俱廩膳生如驥復由欽賜舉人加捐道員十八年之變團練鄉勇緝拿

百官縣志 卷一
逆匪多名蒙恩賜大卷八絲緞一匹

道光志參
畿輔志

齊夢龍字祥安孝廉文振之父家本寒素而存心利物遇人窘急必爲竭力籌畫使得有謀生資嘗大雪車行引壺禦寒見一老人委頓雪中急趨救已瑟縮不能言飲以酒得不死居恆常曰凡事必有心不安處能從心不安處轉求其安處已處人兩得其道矣

蓋盡才及弟盡旺俱監生家小康好施濟嘉慶二十五年境內饑鄉里少壯就食於外老弱轉溝壑蓋氏兄弟出粟煮粥接戶散放鄰村赴食者陸續於塗全活無算

李坤字懷庵天性敦厚不爲刻薄之行父宗孟少貧勤儉自勵家小康慷慨好施坤一承父志凡諸善事皆樂爲之同族

某貧坤貸之貲使貿易贍家數年耗盡僅以逋負簿歸計約三百金坤呼二子至前命悉焚之初中年乏嗣弟有子五人父宗孟鍾愛之坤有子後體父意推產盡讓於弟其純厚率類此次子維達亦多義行

王嘉善字福堂國學生孝廉懋所父性孝友自失怙事兄尤謹兄不善治生歲入常不給嘉善時接濟之分荆之後一如同居待人以忠厚遇急難事必量力攸助有至親負三百餘金終不責其償課子讀書每訓子曰爲人無他惟此方寸地不可顛倒耳

李瑤字鑾坡道光間入貲爲戶部員外郎性剛直好面諍人過精於覈算比歲出納籍無毫釐差謬部務雖至煩劇無不

咄嗟立辦同官咸倚之爲重以親老乞養歸父培宗慷慨好施嘗出千金修試院免編戶累廣東王九經與瑤友善宰赤城負官銀七千餘兩培宗質田代之償人稱厚德瑤一承父志凡諸義舉皆倡爲之歲歉食鄉民粟五百餘石書院乏膏火費爲出京蚨千緡同治中捻匪竄畿南復倡捐數千緡練勇防禦事定大吏敘其功賞戴花翎縣城圯知縣重加修葺一以屬瑤事舉而民不擾其精幹率類此同治十三年卒年八十二子登洲另有傳

毛顏字聞一國學生少家貧未讀書習藝爲生性好施有贏餘輒散編衣助喪葬種種義舉不可殫述復立志捐建義塾至暮年地僅百畝出其半建義塾於東街邑人代爲請獎復

擬在南街續建以紬於力未果後三子德潤成其志

毛德潤字尚誠顏三子天性肫篤好爲義舉同治甲子以廩貢司鐸靜海自奉儉約而以俸金修靜海文廟浚泮池植松柏添祭器置廩田復遵先人遺命建義塾於本邑南街所費皆逾千金提學太守前後旌其門制軍兩次奏請建坊均奉旨賜樂善好施字樣卒年八十四邑人孫朝華誌其墓

馬振業字善長十歲失怙性純篤事繼母孝持身勤儉貧家有急難事必扶助之咸豐三年髮逆陷臨清居民驚擾鄉間罷市窮民無食振業出所蓄按戶給粟七年蝗自東來禾被災復出所有給貧民四方就食者日百數十口糧盡繼之以蔬雜粃糠而食全活無算鄉里請額其門不許後無疾而終

董景和字介石性豪放里有無賴恃醉至其家詐財物父兄與之較無賴子跌撲佯死村人鳴於官父兄懼景和挺身代質令見其氣壯色爲之動又廉得其情約限百日及期無恙官賞之翌日而無賴子死復與貲爲之斂焉孫芳三辛卯捷於鄉

郝開周玉符子繼父志喜捨施咸豐初年出巨萬助軍餉捐綿衣襲寒卒士如挾纊皆聲明不邀獎敘僧忠親王奏明欽賜舉人一體會試並加道銜屢次捐輸又賞加二品頂戴布政使司銜

陳泰然太學生性豪邁好善樂施咸豐七年蝗散粟數百石同治四年旱散錢數百貫每於臘月二十四日招集貧者送

節費焉

陳書聲字掄秀太學生好善樂施咸豐七年蝗出粟數百石計口授糧光緒四年饑出錢數百緡賑貧乏五年春復賑之年八十六歲卒

張鴻遠少失怙母劉氏患癰疾遠竭力孝養母歿奉治命每月朔望齋戒施飯凡遇貧家喪出貲仗助咸豐中流氓蜂起年逢饑饉遠養鄉勇以防寇復出粟按丁賑荒其妻于氏脫簪珥贊之光緒二年里黨額其門

李維達字穎吾國學生自持勤儉至待人獨揮霍無吝色堂兄維善赤貧周給日久不倦從堂姪孝年負債分金相助與兄維果析產獨得薄瘠姊適張姓家貧日給薪米更念兩村

南宮縣志 卷一
三
難及分宅居之一家賴以存活生平以忍教家人有陵侮者
悉不較而耿介性生深惡鄉愿之行義所當爲毀譽不計光
緒二十四年以病卒年八十五

劉士魁字冠卿號曉亭邑庠生慷慨好義施贍族田四十疇
歲租百緡供貧乏建本里義塾置地四十畝臨清武學政義
塾邱縣辛店柳疔村兩義塾南宮倡立字會各施錢數百緡
修聖廟及其他各祠宇各捐數百金友人李福盛貧而鰥爲
之置田納室尤嗜古格言懿訓不惜鐫書訓世如達生編荆
園小語家政要言徐氏瑣言訓學良規勸家良言道德經呂
子節錄等書不下十餘種中丞李公秉衡匾其門孫營德營
之俱邑廩生

閻增秀字翠嶺例貢生家世好善見義勇爲同治初馬賊竄擾鄰近九村舉作團長練勇築砦守禦有方事平九村頌德光緒辛巳邑中修倉積穀倡捐甚鉅奉旨建坊卒年八十一李鳳年及弟鳳雙鳳欽慷慨好施當張錫珠擾亂畿境出資練勇同治三年派理城工盡力縣令額其門六年闔村議築砦鳳年兄弟念鄉里困苦獨出資七千餘緡光緒三年捐倉穀百餘石蒙賜匾額加六品銜後山西河南諸賑均有攸助高鳳山字鴻儒同治三年築村寨首出鉅款且捐地拾畝備歲修費光緒庚辰捐倉穀三百石蒙督憲給匾額

李宗惠字恩普家小康而好義村墟屢年積水爲農人患恩普獨建長橋鄉里有慈航之頌

張從上字欽若家中貲而性揮霍光緒二年夏與堂弟從達出錢四百緡濟貧民

郝成修幼乞食後爲人傭性勤儉數十年有地二百餘畝捐百畝於村廟中光緒庚辰邑建新倉勸捐持京錢二百七十緡銀五兩徒步進城自行捐輸邑令牛昶煦爲勒石壽八十餘

陳繼祖字守業值捻匪擾亂流賊遍畿南繼祖倡義團練一方恃爲保障光緒三年大旱里中饑民嗷嗷待哺苦無富家賑卹繼祖約同人出貲糶穀全活甚眾長子夢蘭光緒戊子科舉人次子夢麟邑庠生

張普英字邦彥進士汝緒子自奉節儉樂爲義舉遇歲歉每

日捨粥就食者數百人其妻翟氏親檢其事子森棠均邑庠生善承先志光緒初年捐納倉穀五百石得匾獎

齊文燧生平好義憫族中貧苦祭埽無貲邀同族公置地五十餘畝以十餘畝奉祀事其餘盡以贍貧者年八十四歲卒韓桂字丹亭優增生慷慨好施光緒初年輸倉穀千石奉旨建坊

華文綱字維三好善樂施有地陸拾畝自恨失讀於光緒二十五年春捐入村塾二十畝名曰識丁義塾

李鵬霄字雲程前涑瀘村人邑庠生家貧設教鄉里時值興辦學堂慨捐制錢三百仟與後涑瀘村合立學堂又立本村初小一處自捐棹登教科書等費百餘仟身任義務教員十

南宮縣志 卷十六
餘年成材眾多民國十年卒年七十二門生魏廣江等樹碑於其墓

李永敬字宗晏孫村人邑增生性慷爽好急人之急鄰村有買牛而不輸稅者爲稅吏所持永敬爲緩頰吏益無狀永敬怒率壯士持馬槌直至吏門將扶之吏聞風逃避事以寢南村有寺僧爲患鄉里以告永敬永敬呼騎率眾一朝馳數十里至南村摔數僧屏之門外闢其寺爲義學其害竟除子剛己爲名進士另有傳

魏履初字用五邑廩生以文學著居鄉排難解紛鄉人倚如長城庚子拳匪亂後襄辦教案尤有功於地方

馮清汪字浩然太學生光緒七年捐倉穀百石二十六年

本村捐穀三十餘石全活無算三十二年捐本村學校宅一所田八十餘畝鄉人旌其門

李壽朋字西伯岳悅村人豪爽仗義光緒庚子拳匪之亂焚毀教堂法教士要求賠償甚鉅民眾抗拒禍且不測壽朋慨將自己倉胡同房百餘間捐於教堂價值約萬元禍乃寢邑人德之

孫長泰字健五城內東街人好義急公邑有興作如繕治城垣修文廟學宮倉廩及纂修縣志等皆倡捐不吝鄉里推重之光緒二十三年直隸總督發給匾額

韓澤恩字沛渥琉璃廟人同治初流寇難作助餉練團一方賴以保障光緒四年大饑捐資助賑全活甚眾鄉人至今稱

之

張芳圃留師村人太學生急公好義光緒二十六年大旱救濟貧乏全活甚多又施地四十畝於小學以資提倡鄉人以好義可風贈之

趙申年字漢周南九宮村人捐鉅資興辦本村小學及城內模範小學又韓文炳字煥文宋旺村人捐鉅資興辦寺旺村兩等小學校皆爲時所稱

馬本魁字朝選館里村人性慈厚有棄嬰者遇之輒出錢穀俾貧家收養乳哺凡全活三數人光緒庚子大旱出積穀以周鄉里民國九年大旱於村中無力者二百餘人皆分給錢米村人稱道之

安振邦字宏庭安家莊人幼貧困壯遊京師習吏事晚年歸里獨出款創立村中小學未成而卒外孫崔蘊樸復出洋千元繼成之村人追念德澤民國十九年立碑

張瀛洲字士登城莊人富甲一鄉先後捐資本村小學及女學爲建築常年等費當事者獎給匾額復創建宗祠施地三畝爲永遠蒸嘗之費村人勒碑記之

杜庭輝字石甫孝昌村人營商京師性尙義俠有鬻女者出鉅金俾令完聚甯晉潘某爲勢豪所陷君百計出之不望報庚子亂後歸里值歲祲倡議捐賑鄉人德之

李榮恩字蓋臣西趙守寨人捐良田四十餘畝甄房一所創立本村小學村人以興學育才匾額榮之

南宮縣志 卷十六
以上任郵

明孔環字伯循正德初以歲貢知來安縣時劉瑾擅權環忤其黨竟爲所陷左遷河南西華教諭六年大盜起霸州奄至西華城陷被執賊持刃迫之曰呼我大王卽舍若環厲聲罵曰賊奴我爲國家臣恨不斬汝萬段以報國肯王逆賊以求活耶遂被害時總制都御史彭澤以死節奏聞詔賜一子冠

帶建祠西華祀之

胡志參
畿輔志

崔燦明萬曆二十二年舉人國初授萊陽知縣順治五年土匪寇掠燦親率僕役挾矢戰矢盡被執不屈死事聞得卹

畿輔志

志

張進寶家貧業傭治生事孫恭憲之裔昌齡遇兵亂隨主人

子姪匿城東隱處一日進寶以事出兵突至有識進寶者向
之索主人進寶不答兵刃亂下進寶嚙其指曰死則死耳不
知主人所在兵以刃裂其口達耳斷舌刺之洞胸而死

畿輔志

劉有濶字觀之崇禎三年舉人十三年進士任順天府推官

甲申殉難

畿輔志

閻汝茂崇禎時歲貢生順天府學訓導甲申殉難

畿輔志

賈還樸號文甫邑諸生侍御道乾長子崇禎戊寅守城城將
陷樸謂弟還素曰吾家爲一邑望今日之事不可徼幸以爲
嚴親羞吾與城存亡可耳弟善自愛有子在猶可慰父母晨
昏一言不及於私明日城陷西北隅矢如雨集樸知事不可
爲乃奮身投城下而絕家人尋得其尸勃勃如生尋以義士

旌其門

尹倫字誠吾邑諸生安貧守志課二子志伊志召讀書皆補諸生雖饘粥不給而怡然有餘樂時郭參政慕其品欲延爲館師倫婉辭謝之人問其故答曰余雖寒士實不能傴僂接要人士各有志不可強也崇禎戊寅城陷倫年七十矣不屈

死

畿輔志

李之琳字盈白商邱丞文振子與弟之榮之美姪調鼎俱爲邑諸生文有奇氣每聞忠孝節義事卽動色崇禎戊寅城陷闔門盡節堯山趙問源弔以詩

畿輔志

李光國字亮園博聞強識試輒高等從遊四十餘人皆俊士崇禎戊寅分守南城城陷投井死

畿輔志

白若鵬邑庠生好讀異書多材藝尤善丹青崇禎戊寅城陷

率長子濯姪其志死之

畿輔志

韓允祺字嗣宗幼從師讀文問何爲師曰欲取青紫耳搖首曰聖人之教不止如是稍長以孝友端嚴聞好誦性理崇禎

戊寅與兄允祥同守埤堞城破俱遇害

畿輔志

連報字少海連三畏字理我連三讓字貞符連得中字用之連得志字仲求五人俱邑庠生崇禎戊寅守城城陷同日殉

難

舊志

清李顯祖字紹夫以父都統漣勳廕任廣巨門千總歷陞貴州平越營遊擊征金川陣亡崇祀昭忠祠

李永慶以父顯祖難廕征金川有功拔爲清江協把總陣亡

崇祀昭忠祠子世襲

李廷梅同治元年率練勇勦捻匪力竭陣亡策冊奏請欽賜雲騎尉世職入忠義祠

岳冬泰同治元年除日捻匪乘不備突過縣城南劫掠村莊冬泰被擄不屈強執之至冀州北內漳村出鐵杖奮擊賊且擊且罵賊眾以戈椿其喉遂遇害十一年奏請給賞雲騎尉世職入忠義祠

陳泰來字冠三同治元年教匪擾畿南泰來倡義團練禦賊於棗強之焦村自己至申持鎗血戰殺賊數十力盡被執賊脅之降泰來罵不屈遂遇害

王來誠傭工於張得印家同治元年流賊大掠得印家人逃

出惟來誠與二少公子在賊來來誠匿二子鄰家陋室中自歸守戶賊逼問主人所在受重傷而不言八十六歲卒

王鶴鳴武舉同治元年流賊過境鶴鳴擊斃其一頃之賊麇至鶴鳴且鬪且走身被數十創力竭被執賊支解之

王元振同治元年捻匪大至入其家索馬甚急元振大聲曰馬誠有之安肯備賊馳驅以禍人賊怒執至巷口其姪恆赴救賊並縛於大樹叔姪罵不絕口同遇害

鄭西甫善拳技同治三年捻匪蜂至西甫帥練勇迎戰力竭陣亡家人昇歸面如生

于光昕曬衣村人光緒中肄業天津武備學堂甲午中日構兵光昕尙爲學員慨然曰國家存亡匹夫有責吾國民也當

以殺敵爲天下倡同學辛得林朱承源李德時李國華周憲章李慶蔣化祥等皆願偕往間關至朝鮮助戰牙山之役日兵敗虜鼠竄主將恐有伏戒勿窮追光昕曰殺敵務盡與辛得林等自成一隊追之主將莫能制止不二三十里與敵遇奮勇爭鬪日兵以爲強敵也集大眾圍之八人以無後援同及於難而光昕之死尤慘事定馮公國璋爲請撫卹並募資立祠於武備學堂之側

韓眞英字豪甫家貧事親至孝親沒以乞討爲生廬墓三年負土築墳高逾尋丈過者皆曰此韓孝子躬築之墳也民國十五年縣知事以孝義旌其門十七年因廢除孔祀力爭不獲忿激之餘遂於丁祭日投孔廟東井中而死

王彥文字質忱李家吳村人民國十年充中區巡官是年秋土匪佔據鄭家堤彥文率警往勦中彈身亡邑人憫之又王慶仁爲本縣保衛隊長十六年會匪數千在城內肆擾慶仁忿甚率警察奮擊之匪奔散慶仁殉焉

以上忠義

南宮縣志卷十六終

邑人邢之襄校